

Headline	FRIM tawar bantuan untuk industri perabot		
MediaTitle	Utusan Borneo Sarawak		
Date	27 Nov 2014	Color	Full Color
Section	Supplement	Circulation	45,554
Page No	A13	Readership	136,662
Language	Malay	ArticleSize	269 cm ²
Journalist	N/A	AdValue	RM 2,103
Frequency	Daily (EM)	PR Value	RM 6,309



FRIM tawar bantuan untuk industri perabot

Institut ada fasiliti lengkap untuk uji kualiti, selain kepakaran dalam bidang reka bentuk

PORT DICKSON: Institut Penyelidikan Perhutanan Malaysia (FRIM) menawarkan kepakaran kepada pengusaha perabot di negara ini dalam usaha mempertingkatkan industri yang turut berkait dengan industri perkayuan negara.

Ketua Pengarahnya Datuk Dr Abd Latif Mohmod berkata FRIM mempunyai fasiliti lengkap untuk menguji kualiti perabot serta bahan mentah selain kepakaran dalam bidang reka bentuk perabot.

“Makmal ujian perabot FRIM melaksanakan semua aspek ujian perabot bagi memastikan perabot Malaysia selamat dan sesuai digunakan serta menepati keperluan pasaran tempatan mahupun antarabangsa,” katanya dalam sidang media di sini semalam.

Katanya sejak ditubuhkan pada 1989, makmal FRIM menjalankan ujian secara purata lebih 2,000 setahun.

Selain kualiti, pengguna amat menekankan aspek reka bentuk perabot justeru produk yang dihasilkan perlu memenuhi kehendak pelanggan dari sudut ergonomik, keselamatan, kestabilan dan keselesaan, katanya.

“Pada masa ini pengguna amat menitikberatkan aspek kualiti ‘nilai bagi wang’ dan produk hijau, dua elemen penting yang perlu diberi perhatian oleh para pereka agar industri perabot sentiasa peka dengan perubahan persekitaran pasaran global supaya dapat terus bersaing di peringkat antarabangsa,” katanya.

Menurut Abd Latif, indus-

tri perabot negara meningkat secara konsisten kepada lebih RM6.2 bilion setahun sejak 2007 hingga 2013.

“Hasil eksport perabot menyumbang kira-kira satu pertiga atau 28 hingga 33 peratus daripada jumlah hasil eksport kayu-kayuan setiap tahun sejak 2001.

“Nilai eksport perabot semakin meningkat dari RM5.08 bilion pada 2001 kepada RM8.71 bilion pada 2008, dan menurun sedikit kepada RM7.62 bilion pada 2009 disebabkan penurunan pasaran ekonomi global sebelum meningkat semula kepada RM8.02 bilion pada 2012,” katanya.

Menurut beliau pada masa ini terdapat 1,895 kilang perabot di seluruh negara yang menghasilkan perabot bagi pasaran tempatan dan antarabangsa.

Terdahulu Abd Latif menghadiri perasmian Simposium Reka Bentuk Perabot Nasional 2014 yang dirasmikan oleh Ketua Pengarah Majlis Amanah Rakyat (MARA) Datuk Ibrahim Ahmad.

Pada majlis itu, FRIM turut melancarkan penerbitan terbaharunya bertajuk ‘Pembuatan Kapal Kayu Tradisional Melayu’ serta menandatangani memorandum persefahaman dengan Pusat Sumber Teknologi Perabot MARA (FITEC) untuk bekerjasama dalam reka bentuk perabot dan pembangunan produk selama dua tahun.

Simposium dua hari anjuran bersama FRIM dan FITEC itu bertujuan menggalak dan memperkukuh industri perabot Malaysia di peringkat global. — Bernama